

6. maj 2016

2016-imi aasartinnagu Telepost A/S-imi piginnittuunermut periusissiamik ersarissumik Naalackersuisut suliaqarnissaannik Inatsisartunut aalajangiiffigisassatut siunnersuut. Piginnittuunermut periusissiassami tele-p iluani namminersortunngorsaannissami pilersaarutit naatsorsuutiginninnerillu ersarissumik allanneqarsimassapput. Tamatuma saniatigut ingerlassanut Telepost A/S-mut toqqaannartumik imminut akilersinnaanngitsunut Telepost A/S-ip aningaasaliinissaanut qanoq naatsorsuutiginninnerit ersarissarneqarsimassapput, taakkunungalu søkabelip tallineqarnissaanut radiokædellu pitsanngorsarneqarnissaanut pisat ilaapput.

(Inatsisartunut ilaasortaq Kalistat Lund, Inuit Ataqatigiit)

Inatsisartunut ilaasortaq Kalistat Lund, Inuit Ataqatigiit siunnersuummik massuminnga saqqummiussaqaqneranut Siumumiit qujavugut, imaattumillu oqaaseqarfigissavarput.

Siumumiit ilisimavarput telekkut attaveqaatit ukiorpassuannortuni ineriartortinneqarsimanerat annertoorujussuusoq, taamaalilluni nunarput isorartugaluqaaluni inukitsunnguugaluarlunilu attaveqaatitigut toqqissisimanartumik pitsaasumillu ineriartortinneqarsimalluni. Taamaattoq aamma ilisimavarput nunatsinni ukiuni aggersuni attaveqaateqarnikkut atukkat sulii annertuumik pitsanngorsagassaasut.

Oqareernitsituut Kalaallit Nunaanni inuit amerlanngilagut, isorartuumilu nunaqarluta. Tamaatutaaq avinngarusimasumik najugaqariaaseqarluta. Assersuutigalugu Siorapalumniit kujammut Narsamijit tikillugu isorartussuseq europamut naleqqersuukkaanni tassaavoq Norgep kujataaniit Afrikap avannaa tikillugu. Taamaammat nunatsinni telekkut attaveqaasersorneq eqqarsaatigalugu nammaqatigiinneq avaqquneqarsinnaanersoq Siumumiit apeqqusertariaqarlugu matumani oqaatigissavarput.

Siumumi ilisimavarputtaaq telekkut attaveqaatit nammaqatigiinnermik toqqammaveqartut, taamaasilluni mobilikkut sianerneq sumiikkaluaraanniluunniit minutsimut akia assigiippoq. Tamanna ajornanngilaq nammaqatigiinneq attaveqaatitigut politikki atuummat.

Aallarniuteqarnitsinnilu oqaatigaarput pitsanngorsaannissat annertuut ukiuni aggersuni pilersaarusionerqarlutillu suliarineqalersaartut ilisimagatsigik, tassalu Nuummiit aqqusaarlugit Maniitsoq, Sisimiut, Aasiaallu tikillugit immap naqqatigut attaveqaat suliarineqalersoq, kiisalu Upernavik maannakkut qaammataasakkuinnaq attaveqartoq, sineriammi sakkortusaavikkut attaveqaatinut pilersitsiffiussasoq.

Tamanna innuttaasunut amerlasuunut iluaqutaassasoq qularnanngilaq, taamaattoq aamma ilisimavarput aningaasarpassuarnik naleqartussaasut, tamannalu nammaqatigiinnerup piviusunngortissagaa.

Taamaammat una qulequtaq pineqartillugu Siumumiit kaammattuutigissavarput toqqammavik siunissami attaveqaasersornikkut periuseq tamanna qimanneqassappat qimanniarneqassappalluunniit innarlernaveersaarinnissaq aqqutaasariaqarmat. Innuttaasunut illoqarfiit annerit avataaniittunut ajorseriaammik kingunerlussinnaanera akisunaarneqarsinnaaneralu Siumumiit arajutseqqannginnatsigu matumani oqaatigissavarput.

Taamaammat piginnittuunermut periusissiamik ersarissumik Naalakkersuisut suliaqarnissaannik Inatsisartunut aalajangiiffigisassatut siunnersuut Siumumiit isumaqatiginartoqartipparput. Taamaattoq piffissaliussap, tassalu 2016-imi aasartinnagumut taggissisimaneq allanngortinneqarnissaa Siumumiit kaammattuutigissavarput. Qulequtarmi manna peqqissaarullugu suliaq Upernaakkut 2017-imi Inatsisartut ataatsimiinnerisa nalaanni agguaassassanngortinneqassasoq Siumumiit siunnersuutigaarput.

Naggataatigullu Siumumiit ersarissaatigissavarput piginnittuunermut periusissiaq matumani pineqarmat, suliffeqarfiup ingerlanneqarneranut periussissiaq pineqarani.

Taamatut Siumumiit oqaaseqarluta siunnersuut aappassaaneerneqartinnagu Sanaartornermut ataatsimiititaliami suliarineqaqqaarnissaa innersuussutigivarput.

Anders Olsen, Siumut.